



ԱՎԴ2/0019/06/21

ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ  
ՎՃՌԱԲԵԿ ԴԱՏԱՐԱՆ  
Ո Ր Ո Շ ՈՒ Մ  
ՀԱՆՈՒՆ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ

Հայաստանի Հանրապետության  
ՀՀ վերաքննիչ քրեական դատարանի որոշում  
Նախագահող դատավոր՝ Ս.Մարաբյան

17 մայիսի 2024 թվական

ք.Երևան

ՀՀ Վճռաբեկ դատարանի քրեական պալատը (այսուհետ՝ Վճռաբեկ դատարան),

նախագահությամբ՝ ՀԱՍՏԱՏՐՅԱՆԻ  
մասնակցությամբ դատավորներ՝ Ս.ԱՎԵՏԻՍՅԱՆԻ  
Լ.ԹԱԴԵՎՈՍՅԱՆԻ  
Դ.ԽԱԶԱՏՈՒՐՅԱՆԻ  
Ա.ՊՈՂՈՍՅԱՆԻ  
Ս.ՕՀԱՆՅԱՆԻ

գրավոր ընթացակարգով քննության առնելով մեղադրյալ Երեմ Վահանի  
Հովհաննիսյանի վերաբերյալ ՀՀ վերաքննիչ քրեական դատարանի՝ 2021 թվականի  
հուլիսի 7-ի որոշման դեմ ՀՀ գլխավոր դատախազի տեղակալ Ա.Աֆանդյանի  
վճռաբեկ բողոքը,

## **Պ Ա Ր Զ Ե Ց**

### **Գործի դատավարական նախապատմությունը.**

1. ՀՀ քննչական կոմիտեի Վայոց ձորի մարզային քննչական վարչությունում 2021 թվականի ապրիլի 3-ին հարուցվել է թիվ 37100921 քրեական գործը՝ 2003 թվականի ապրիլի 18-ին ընդունված ՀՀ քրեական օրենսգրքի (այսուհետ՝ նաև՝ ՀՀ քրեական օրենսգիրք) 258-րդ հոդվածի 4-րդ մասի հատկանիշներով:

Նախաքննության մարմնի՝ 2021 թվականի ապրիլի 3-ի որոշմամբ Երեմ Վահանի Հովհաննիսյանը ձերբակալվել է:

Նախաքննության մարմնի՝ 2021 թվականի ապրիլի 6-ի որոշմամբ Ե.Հովհաննիսյանը ներգրավվել է որպես մեղադրյալ, և նրան մեղադրանք է առաջադրվել ՀՀ քրեական օրենսգրքի 258-րդ հոդվածի 4-րդ մասով:

Արարատի և Վայոց ձորի մարզերի առաջին ատյանի ընդհանուր իրավասության դատարանի՝ 2021 թվականի ապրիլի 6-ի որոշմամբ բավարարվել է նախաքննության մարմնի միջնորդությունը, և մեղադրյալ Ե.Հովհաննիսյանի նկատմամբ որպես խափանման միջոց է ընտրվել կալանավորումը՝ 2 (երկու) ամիս ժամկետով:

1.1. Նախաքննության մարմինը 2021 թվականի մայիսի 20-ին միջնորդություն է ներկայացրել Արարատի և Վայոց ձորի մարզերի առաջին ատյանի ընդհանուր իրավասության դատարան (այսուհետ՝ նաև Առաջին ատյանի դատարան)՝ Ե.Հովհաննիսյանին կալանքի տակ պահելու ժամկետը 2 (երկու) ամսով երկարացնելու վերաբերյալ:

1.2. Նախաքննության մարմնի՝ 2021 թվականի մայիսի 25-ի որոշմամբ մեղադրյալ Ե.Հովհաննիսյանին առաջադրված մեղադրանքը փոփոխվել, և նրան նոր մեղադրանք է առաջադրվել ՀՀ քրեական օրենսգրքի 34-104-րդ հոդվածի 1-ին մասով:

2. Առաջին ատյանի դատարանի՝ 2021 թվականի մայիսի 25-ի որոշմամբ մասնակի բավարարվել է նախաքննության մարմնի միջնորդությունը, և մեղադրյալ Ե.Հովհաննիսյանին կալանքի տակ պահելու ժամկետը երկարացվել է 1 (մեկ) ամիս ժամկետով:

3. Դատախազ Գ.Խաչիկյանի, պաշտպաններ Ա.Կարապետյանի և Ս.Հովհաննիսյանի վերաքննիչ բողոքների քննության արդյունքում, ՀՀ վերաքննիչ քրեական դատարանը (այսուհետ՝ նաև Վերաքննիչ դատարան) 2021 թվականի հուլիսի 7-ի որոշմամբ դատախազի բողոքը մերժել է, իսկ պաշտպանների բողոքը բավարարել է բեկանել և փոփոխել է Առաջին ատյանի դատարանի՝ 2021 թվականի մայիսի 25-ի որոշումը, մերժել է մեղադրյալ Ե.Հովհաննիսյանին կալանքի տակ պահելու ժամկետը երկարացնելու մասին նախաքննության մարմնի միջնորդությունը, վերացրել նրա նկատմամբ որպես խափանման միջոց կիրառված կալանավորումը և նրան ազատել կալանքից:

4. Վերաքննիչ դատարանի վերոնշյալ որոշման դեմ ՀՀ գլխավոր դատախազի տեղակալ Ա.Աֆանդյանը վճռաբեկ բողոք է բերել, որը Վճռաբեկ դատարանի՝ 2021 թվականի դեկտեմբերի 6-ի որոշմամբ ընդունվել է վարույթ<sup>1</sup>: Վճռաբեկ դատարանի՝ 2022 թվականի մարտի 15-ի որոշմամբ սահմանվել է վճռաբեկ բողոքի քննության գրավոր ընթացակարգ:

### **Վճռաբեկ բողոքի հիմքերը, հիմնավորումները և պահանջը.**

5. Բողոքի հեղինակը նշել է, որ Վերաքննիչ դատարանը հիմնավոր կասկածի բացակայության մասով կայացրել է անհիմն, չպատճառաբանված որոշում, թույլ է տվել 1998 թվականի հուլիսի 30-ին ընդունված ՀՀ քրեական դատավարության օրենսգրքի (այսուհետ նաև՝ ՀՀ քրեական դատավարության օրենսգիրք) 6-րդ, 17-րդ, 55-րդ, 135-րդ, 136-րդ և 137-րդ հոդվածներով նախատեսված պահանջների խախտումներ, ինչի հետևանքով խաթարվել է մասնավոր և հանրային շահերի հավասարակշռությունը: Բողոքաբերը նշել է, որ վիճելի են Վերաքննիչ դատարանի կողմից ձևավորված վերացական, ձևական և անորոշ հետևությունները, որոնց արդյունքում վերջինս հանգել է սխալ հետևության:

5.1. Բողոքաբերը նշել է, որ տվյալ դեպքում անձի արարքի իրավական գնահատականի փոփոխման հետ մեկտեղ Վերաքննիչ դատարանի կողմից պետք է

<sup>1</sup> Համաձայն ՀՀ քրեական դատավարության օրենսգրքի՝ անցումային դրույթները կարգավորող 483-րդ հոդվածի 8-րդ մասի՝ Վճռաբեկ բողոքը քննվում է 1998 թվականի հուլիսի 1-ին ընդունված ՀՀ քրեական դատավարության օրենսգրքով սահմանված կարգով:

գնահատման ենթարկվելու նաև այն հանգամանքը, որ անձին մեղսագրված արարքի փաստական հանգամանքների էական փոփոխություն տեղի չի ունեցել, և որ արարքի իրավական գնահատականը խստացվել է՝ հաշվի առնելով ենթադրյալ հանցանքի կատարման շարժառիթը: Մասնավորապես, բողոքաբերը փաստել է, որ վարույթն իրականացնող մարմինը Ե.Հովհաննիսյանին մեղսագրված արարքը վերադրակել է առանձնապես ծանր հանցագործության համար քրեական պատասխանատվություն սահմանող նորմով, քանի որ պարզել է, որ հանցավորը ենթադրաբար ոչ թե հասարակական կարգը խախտելու, այլ թշնամական շարժառիթով սպանություն կատարելու դիտավորություն է ունեցել, ինչն անտեսվել է Վերաքննիչ դատարանի կողմից:

5.2. Այսպիսով, բողոքաբերը եզրակացրել է, որ երբ ըստ էության նույնատիպ փաստական հանգամանքների պարագայում անձին մեղսագրվող արարքին տրված իրավական գնահատականը փոխվում է, ապա դատարանները հիմնավոր կասկածի հարցը քննարկելիս պետք է առաջնորդվեն ոչ թե ձևական պահանջների պահպանմամբ, այլ մեղադրանքի էության գնահատմամբ:

6. Վերոգրյալի հիման վրա բողոք բերած անձը խնդրել է բեկանել Վերաքննիչ դատարանի՝ 2021 թվականի հուլիսի 7-ի որոշումը և մերժել պաշտպանների բողոքը:

### **Վճռարեկ բողոքի քննության համար էական նշանակություն ունեցող փաստական հանգամանքները.**

7. Նախաքննության մարմնի՝ 2021 թվականի ապրիլի 6-ի որոշմամբ Ե.Հովհաննիսյանը ներգրավվել է որպես մեղադրյալ, և նրան մեղադրանք է առաջադրվել ՀՀ քրեական օրենսգրքի 258-րդ հոդվածի 4-րդ մասով՝ հետևյալ արարքի համար. «(...) [Ն]ա մի խումբ անձանց հետ որպես զենք օգտագործած առարկայի ողորկափող հրազենի օգտագործմամբ անձի նկատմամբ բռնություն գործադրելու սպառնալիքով կատարել է խուլիգանություն:

Այսպես. Երեմ Հովհաննիսյանը, նրա ընկերներ Աշոտ Գարեգինի Սահակյանը և Վասպուրական Սմբարի Միխիթարյանը 2021 թվականի ապրիլի 3-ին՝ ժամը 16-ի սահմաններում, Երեմ Հովհաննիսյանի վարած «ԲՄՎ X 5» մակնիշի 77 TT 050 հաշվառման համարանիշի ավտոմեքենայով գնացել են Եղեգնաձոր քաղաքի

Երևանյան խճուղու թիվ 1 հասցեում գործող, հասարակական վայր հանդիսացող ավտոտեխսպասարկման կետի մոտ, որտեղ Երեմ Հովհաննիսյանը և Աշոտ Սահակյանն իրենց անձի ենթադրյալ առավելությունն ընդգծելու մոլուցքով տարված, բացահայտ անհարգալից վերաբերմունք ու անթաքույց արհամարհանք դրսևորելով շրջապատի՝ ավտոտեխսպասարկման կետի աշխատակից Տարոն Նորայրի Հարությունյանի նկատմամբ, անհիմն վիճաբանության են բռնվել ավտոտեխսպասարկման կետից դուրս եկած Արամ Մարտիրոսի Հովհաննիսյանի հետ, որի ընթացքում Երեմ Հովհաննիսյանը Վասպուրակ Մխիթարյանի հետ բռնություն են գործադրել Արամ Հովհաննիսյանի նկատմամբ, մասնավորապես՝ առանց նրա կամքը հաշվի առնելու, դիտավորությամբ բռնել են նրա ձեռքից և քաշքշել, որի ընթացքում նաև Աշոտ Սահակյանը «ԲՄՎ X 5» մակնիշի 77 TT 050 հաշվառման համարանիշի ավտոմեքենայի բեռնախցիկից ցուցադրաբար դուրս է հանել TG 1 տիպի 12X76 մմ տրամաչափի 1915590051 համարի որսորդական ողորկափող հրազենը, ինչը նկատել է Արամ Հովհաննիսյանը, ով առողջության համար իրական վրանգ զգալով՝ դիմել է փախուստի: Այդ պահին Աշոտ Սահակյանը վերոնշյալ զենքը փոխանցել է Երեմ Հովհաննիսյանին, ով իր հերթին հետապնդելով Արամ Հովհաննիսյանին, նրա առողջության համար իրական վրանգ սրելով եղանակով, 20-30 մետր հեռավորությունից վերջինիս ուղղությամբ արձակել է երեք կրակոցներ, որոնք Արամ Հովհաննիսյանին թեև չեն դիպել, սակայն լուրջ անհանգստություն և վախի զգացում են առաջացրել Տարոն Նորայրի Հարությունյանի մոտ, որպիսի հանգամանքով պայմանավորված՝ նա չի միջամտել տեղի ունեցած վիճաբանությանը:

Կրակոցներ արձակելուց հետո Երեմ Հովհաննիսյանը, Աշոտ Սահակյանն ու Վասպուրակյան Մխիթարյանը «ԲՄՎ X 5» մակնիշի 77 TT 050 հաշվառման համարանիշի ավտոմեքենայով դեպքի վայրից դիմել են փախուստի, սակայն բռնվել են ոստիկանության Արարատի բաժնի Արարատի բաժանմանունքի աշխատակիցների կողմից և բերման ենթարկվել ոստիկանության բաժնի (...):<sup>2</sup>

7.1. Մեղադրյալ Ե.Հովհաննիսյանին կալանքի տակ պահելու ժամկետը 2 (երկու) ամսով երկարացնելու վերաբերյալ նախաքննության մարմնի՝ 2021 թվականի

<sup>2</sup> Տե՛ս նյութեր, հատոր 1, թերթեր 104-105:

մայիսի 20-ի միջնորդության քննությունն Առաջին ատյանի դատարանում նշանակվել է 2021 թվականի մայիսի 25-ին<sup>3</sup>:

7.2. Նախաքննության մարմնի՝ 2021 թվականի մայիսի 25-ի որոշմամբ մեղադրյալ Ե.Հովհաննիսյանին առաջադրված մեղադրանքը փոփոխվել է, և նրան նոր մեղադրանք է առաջադրվել ՀՀ քրեական օրենսգրքի 34-104-րդ հոդվածի 1-ին մասով՝ հետևյալ արարքի համար. «(...) [Ը]նկերոջ՝ Աշոտ Սահակյանի հետ միասին 2021 թվականի ապրիլի 3-ին՝ ժամը 16:00-ի սահմաններում, իր կողմից վարած «ԲՄՎ X 5» մակնիշի 77 TT 050 հաշվառման համարանիշի ավտոմեքենայով Երևան–Մեղրի միջպետական ճանապարհով դեպի Եղեգնաձոր քաղաքի ուղղությամբ երթևեկելու ընթացքում Եղեգնաձոր քաղաքի Երևանյան խճուղու թիվ 1 հասցեում գործող ավտոտեխապասարկման կետի դիմաց նկատելով Արամ Հովհաննիսյանին պարկանոդ «Վագ 2107» մակնիշի ավտոմեքենան, հետընթաց է կատարել և կայանել ավտոտեխապասարկման կետի դիմաց: Իջնելով ավտոմեքենայից՝ Երեմ Հովհաննիսյանը և Աշոտ Սահակյանը վիճաբանության մեջ են մտնել ավտոտեխապասարկման կետից դուրս եկած Արամ Հովհաննիսյանի հետ՝ պայմանավորված վերջինիս և Երեմ Հովհաննիսյանի միջև տևական ժամանակ ձևավորված լարված փոխհարաբերություններով, որի ընթացքում Երեմ Հովհաննիսյանը բռնել է Արամ Հովհաննիսյանի աջ ձեռքից, Աշոտ Սահակյանը «ԲՄՎ X 5» մակնիշի 77 TT 050 հաշվառման համարանիշի ավտոմեքենայի քեռնահցիկից հանել է իր անվամբ հաշվառված TG 1 տիպի 12X76 մմ տրամաչափի 1915590051 համարի որսորդական ողորկափող հրազենը, ինչը նկատելով՝ Արամ Հովհաննիսյանը ձեռքը քաշելով ազատվել է Երեմ Հովհաննիսյանից և իր կյանքի ու առողջության համար իրական վրանգ զգալով՝ դիմել է փախուստի: Այդ պահին Աշոտ Սահակյանը հանցագործության գործիք հանդիսացող վերոնշյալ զենքը փոխանցել է Երեմ Հովհաննիսյանին, ով հետապնդել է Արամ Հովհաննիսյանին ու սպորինաբար նրան կյանքից զրկելու ուղղակի դիտավորությամբ, 20-30 մետր հեռավորությունից՝ 2 հար «RECORD 0-4,25 mm N-0-70mm» տեսակի և մեկ հար «CHEDDITE» տեսակի որսորդական փամփուշտներով, երեք կրակոց է արձակել վերջինիս ուղղությամբ, սակայն իր կամքից անկախ հանգամանքներում

<sup>3</sup> Տե՛ս նյութեր, հատոր 1, թերթեր 264-273, 277:

*հանցագործությունն ավարտին չի կարողացել հասցնել, քանի որ Արամ Հովհաննիսյանին հաջողվել է փախչել և փրկել իր կյանքը (...)*»<sup>4</sup>:

7.3. Քննիչ Վ.Ավետիսյանը, պատասխանելով Առաջին ատյանի դատարանում նիստը նախագահողի հարցին, հայտնել է, որ միջնորդությունը ներկայացվել է 2021 թվականի մայիսի 20-ին, և այդ օրվա դրությամբ մեղադրյալ Ե.Հովհաննիսյանին ՀՀ քրեական օրենսգրքի 34-104-րդ հոդվածի 1-ին մասով մեղադրանք առաջադրված չի եղել, և որ միջնորդության մեջ ներկայացված հիմնավոր կասկածը վերաբերում է ՀՀ քրեական օրենսգրքի 258-րդ հոդվածի 4-րդ մասով առաջադրված մեղադրանքին: Բացի այդ, քննիչը նշել է նաև, որ այդ պահի դրությամբ քննարկելի է ՀՀ քրեական օրենսգրքի 258-րդ հոդվածի 4-րդ մասով առաջադրված մեղադրանքով կալանքի տակ պահելու ժամկետը երկարացնելու միջնորդությունը, և քանի որ ներկայումս Ե.Հովհաննիսյանը մեղադրվում է ավելի ծանր արարքի կատարման մեջ, գտել է, որ նրան կալանքի տակ պահելու ժամկետը երկարացնելու միջնորդությունը հիմնավոր է<sup>5</sup>:

8. Առաջին ատյանի դատարանը, 2021 թվականի մայիսի 25-ի որոշմամբ անդրադառնալով մեղադրյալ Ե.Հովհաննիսյանին կալանքի տակ պահելու ժամկետը երկարացնելու վերաբերյալ նախաքննության մարմնի միջնորդությանը, արձանագրել է հետևյալը. «(...) [Մ]եղադրյալ Ե.Հովհաննիսյանն առնչություն ունի իրեն մեղսագրվող ենթադրյալ հանցագործությանը, այսինքն՝ առկա է տվյալ ենթադրյալ հանցագործության կատարման մեջ հիմնավոր կասկածը, առնչությունը, ինչպես նաև դեպքի համընկնումը այն ենթադրյալ հանցանքին, որոնց առերևույթ կատարման մեջ Ե.Հովհաննիսյանը մեղադրվում է: Դրա վկայությունն են՝ սույն միջնորդության մեջ շարադրված, ինչպես նաև միջնորդությանը կից ներկայացված ապացույցները, մասնավորապես, դեպքի վայրի զննության արձանագրությունը, տուժող Արամ Մարտիրոսի Հովհաննիսյանի, վկա Տարոն Նորայրի Հարությունյանի հարցաքննության արձանագրությունները, վկա Տարոն Հարությունյանի և տուժող Արամ Հովհաննիսյանի, վկա Տարոն Հարությունյանի և կասկածյալ Երեմ Հովհաննիսյանի, վկա Տարոն Հարությունյանի

<sup>4</sup> Տե՛ս նյութեր, հատոր 1, թերթեր 282-287:

<sup>5</sup> Տե՛ս նյութեր, հատոր 1, թերթեր 292-301:

և կասկածյալ Աշոտ Գաբեգինի Սահակյանի առերես հարցաքննության արձանագրությունները, «ԲՄՎ X 5» մակնիշի 77 TT 050 հաշվառման համարանիշի ավերումը ենթադրյալ խուզարկության արձանագրությունը:

Այսինքն՝ վերը նշված փաստական փյույակները բավարար են Ե.Հովհաննիսյանին մեղսագրվող արարքին վերջինիս առնչությունը /հիմնավոր կասկածը/ հաստատված համարելու և լիովին ապահովում են կալանավորումը որպես խափանման միջոցի կիրառման և կալանքի ժամկետը երկարացնելու պայմանները:

Վայոց ձորի մարզային քննչական վարչության քննիչ Վ.Ավերիսյանի միջնորդության մեջ նշված մեղադրյալ Ե.Հովհաննիսյանի ազատության մեջ մնալու դեպքում ՀՀ քրեական դատավարության օրենսգրքի 135-րդ հոդվածի 1-ին մասի 1-ին, 2-րդ, 3-րդ կետերով նախատեսված նրա հավանական գործողությունների մասին Վ.Ավերիսյանի դատարանում ներկայացված հետևությունները նույնպես հիմնված են գործի նյութերից բխող ողջամիտ ենթադրությունների վրա, որոնք դատարանը համարում է առկա:

Հաշվի առնելով նաև այն հանգամանքը, որ մեղադրյալ Ե.Հովհաննիսյանին մեղսագրվող ՀՀ քրեական օրենսգրքի 258-րդ հոդվածի 4-րդ մասով արարքը դասվում է ծանր հանցագործությունների շարքին, որի համար նախատեսվում է պարիժ՝ ազատազրկում 4-7 տարի ժամկետով, բացի այդ, փոփոխվել է նրան առաջադրված մեղադրանքը ՀՀ քրեական օրենսգրքի 34-104-րդ հոդվածի 1-ին մասով, որի համար նախատեսվում է պարիժ ութից տասնհինգ տարի ժամկետով, որն էականորեն բարձրացնում է մեղադրյալի կողմից վարույթն իրականացնող մարմնից թաքնվելու հավանականությունը, վերոգրյալը ևս հաստատում է ազատության մեջ գտնվելու դեպքում մեղադրյալի՝ հավանական գործողությունների մասին միջնորդության մեջ նշված Վ.Ավերիսյանի հետևությունները, քանի որ անձին մեղսագրվող հանցանքի ծանրությունն ու ակնկալվող պարիժի խստությունը էական նշանակություն ունի ազատության մեջ գտնվող մեղադրյալի վարքագծի հավանականությունը կանխորոշելու հարցում և այդ հանգամանքը հաստատվել է ՀՀ քրեական դատավարության օրենսգրքի 135-րդ հոդվածի 3-րդ մասում մարմաննշված հանգամանքների համարեքստում:



(...)

Նկարի ունենալով, որ մինչդարական վարությոն իրականացնող մարմինը թեև որսկորել է պարշաճ ջանասիրություն գործի քննությունն օրենքով սահմանված ժամկետում ավարտելու համար, սակայն դեռևս անհրաժեշտ է սրանսկ նշանակված փորձաքննության եզրակացությունը, կարարել դրա հետ կապված անհրաժեշտ դարավարական գործողություններ, զննել խուզարկությամբ ավրոմեքենայից հայրնաքելված հեռախոսների պարունակությունը, կարարել դրանցից բխող այլ քննչական ու դարավարական գործողություններ, հետաքննության մարմնի կողմից ձեռնարկվող միջոցառումների արդյունքներով կարարել մեղադրյալ Աշուր Սահակյանի կողմից օգրագործվող հեռախոսահամարից կայացած հեռախոսազանգերի վերծանումների րվյալներում նշված՝ հետաքրքրություն ներկայացնող անձանց հարցաքննություններ, որից հետո վերջնական քրեաիրավական գնահարական րալ վերջինիս արարքին, այնուհետև կողմերին հայրնել նախաքննության ավարտման մասին և ծանոթացնել քրեական գործի նյութերին, պարզել վերջիններիս կողմից միջնորդություններ ունենալու հանգամանքը, այդպիսիք լինելու դեպքում քննարկել և լուծել դրանք, որից հետո կազմել մեղադրական եզրակացություն և քրեական գործն ուղարկել դարարան, և նկարի ունենալով, որ քրեական գործով կազմված է քննչական խումբ, որում ներառված են ևս երկու քննիչներ, դարարանը վերոգրյալները համարում է րավարար հիմք՝ քննիչի միջնորդությունը մասնակի րավարարելու և մեղադրյալ Երեմ Հովհաննիսյանին կալանքի րակ պահելու ժամկետը 1 ամիս ժամանակով երկարացնելու համար (...)»<sup>6</sup>:

9. Վերաքննիչ դատարանը 2021 թվականի հուլիսի 7-ի որոշմամբ արձանագրել է հետևյալը. «(...) Վերաքննիչ դարարանը փաստում է, որ հիմնավոր կասկածին դարարանը պետք է անդրադառնա և գնահարական րա այն համարեքստում, որը վերաքերում է խափանման միջոց կալանավորումը կիրառելու կամ դրա ժամկետը երկարացնելու մասին միջնորդության մեջ նշված մեղադրանքին, քանի որ հենց այդ միջնորդությունն է ընդգծում դարական վերահսկողության առարկան ու սահմանները, որից դուրս գալու իրավասություն դարարանը չունի: Ի վերջո,

<sup>6</sup> Տե՛ս նյութեր, հատոր 1-ին, թերթեր 292-301:

դատարանը, որպես անձի անձնական ազատության նկատմամբ դատական վերահսկողություն իրականացնող մարմին, ստուգում է քննիչի կողմից միջնորդության մեջ նշված անձին ազատությունից զրկելու համար բերված հիմքերի, հիմնավորումների, պայմանների և այլնի առկայությունը /բացակայությունը և չի կարող քննիչի միջնորդության մեջ չնշված որևէ այլ հանգամանք և փաստարկ հիմք ընդունել հոգուր անձի կալանավորման, քանի որ դրանով կհախարի ոչ միայն օրինականության, կողմերի իրավահավասարության և մրցակցության սկզբունքները, այլև անձի դատական պաշտպանության արդյունավետ միջոց ունենալու, ներկայացված միջնորդությունից պաշտպանվելու իրավունքը, և ըստ էության դատարանը կվերածվի քրեական հետապնդման մարմնի՝ օբյեկտիվ և անկողմնակալ արժիտրի փոխարեն:

Վերաքննիչ դատարանը, հիմք ընդունելով այն հանգամանքը, որ շարունակական կալանքի մասին որոշում կարող է կայացվել բացառապես այն դեպքում, երբ դատարանը հաստատած կհամարի, որ հիմնավոր կասկածը շարունակում է առկա լինել, ընդ որում այն մեղադրանքի սահմաններում, որը ներկայացվել է միջնորդության մեջ (Վերաքննիչ դատարանի կարծիքով սա իմպերատիվ կանոն է), փաստում է, որ մեղադրանքի փոփոխությունը բացառում է սկզբնական մեղադրանքով հիմնավոր կասկածի քննությունն առհասարակ, քանի որ այն այլևս օբյեկտիվորեն գոյություն չունի, հետևաբար, ինքնին այդ հանգամանքը բավարար է փաստելու, որ սկզբնական մեղադրանքով հիմնավոր կասկածի մասին խոսք լինել չի կարող, այն բացակայում է: Իսկ փոփոխված մեղադրանքով քննիչի ներկայացրած միջնորդությունը քննության առարկա չի կարող դարձվել, քանի որ օրենսդրությամբ նախատեսված չէ նման հնարավորություն, այսինքն՝ քննիչն իրավունք չունի փոխելու միջնորդության մեջ նշված նախնական մեղադրանքը, իսկ դատարանն իրավունք չունի հիմք ընդունելու միջնորդությունից դուրս և միջնորդության մեջ չնշված որևէ մեղադրանք և քննարկելու դրա շրջանակներում հիմնավոր կասկածի առկայության հարցը:

(...)

Առաջին աստիճանի դատարանի որոշման պատճառաբանական մասի վերլուծությունից պարզ է դառնում, որ Դատարանը հիմնավոր կասկածի հարցը

քննարկել և հանգել է եզրակացության, որ մեղադրյալ Ե.Հովհաննիսյանն առնչություն ունի իրեն մեղսագրվող ենթադրյալ հանցագործությանը, մինչդեռ պարզ չի դառնում, թե Առաջին արյանի դատարանը ո՞ր մեղադրանքով է հաստատված համարել հիմնավոր կասկածը՝ ՀՀ քրեական օրենսգրքի 258-րդ հոդվածի 4-րդ մասով, թե 34-104-րդ հոդվածի 1-ին մասով, ավելին՝ նշել է, որ մեղադրյալ Ե.Հովհաննիսյանին մեղսագրվող ՀՀ քրեական օրենսգրքի 258-րդ հոդվածի 4-րդ մասով արարքը դասվում է ծանր հանցագործությունների շարքին, որի համար նախատեսվում է պարիժ ազատազրկում 4-7 տարի ժամկետով, բացի այդ փոփոխվել է առաջադրված մեղադրանքը ՀՀ քրեական օրենսգրքի 34-104-րդ հոդվածի 1-ին մասով, որի համար նախատեսվում է պարիժ ութից տասնհինգ տարի ժամկետով, որն էականորեն բարձրացնում է մեղադրյալի կողմից վարույթն իրականացնող մարմնից թաքնվելու հավանականությունը:

Փաստացի սրացվում է, որ Առաջին արյանի դատարանը հիմնավոր կասկածը քննարկել և հաստատված է համարել ինչպես ՀՀ քրեական օրենսգրքի 258-րդ հոդվածի 4-րդ մասով, այնպես էլ 34-104-րդ հոդվածի 1-ին մասով, մինչդեռ առաջինը գոյություն չի ունեցել Դատարանի կողմից որոշում կայացնելու պահին, քանի որ այն արդեն իսկ քննիչի կողմից փոփոխված է եղել, իսկ երկրորդ մեղադրանքով միջնորդություն Դատարանում չի եղել, հետևաբար Առաջին արյանի դատարանը չէր կարող այն քննարկել, որպեսզի դուրս չգար միջնորդության սահմաններից ու առարկայից և չվերածվեր քրեական հետապնդման մարմնի: Ընդ որում, առավել խնդրահարույց է այն, որ Առաջին արյանի դատարանը մեղադրյալին կալանքի տակ պահելու ժամկետը երկարացնելու անհրաժեշտությունը հիմնավորելու համար հիմք է ընդունել ինչպես ՀՀ քրեական օրենսգրքի 258-րդ հոդվածի 4-րդ մասով նախատեսված հանցագործության համար օրենքով սահմանված պարժաչափը, այնպես էլ 34-104-րդ հոդվածի 1-ին մասով նախատեսված հանցագործության համար օրենքով սահմանված պարժաչափը, մինչդեռ, ինչպես նշվեց՝ առաջինը գոյություն չունի այլևս, իսկ երկրորդի մասով միջնորդություն չկա:

Վերոգրյալի հիման վրա Վերաքննիչ դատարանն արձանագրում է, որ Առաջին արյանի դատարանն անձին կալանքի տակ պահելու ժամկետը երկարացնելու մասին որոշում է կայացրել այդ պահին գոյություն չունեցող

մեղադրանքով, փաստելով նաև մյուս մեղադրանքի առկայությունը, որի վերաբերյալ միջնորդություն ներկայացված չի եղել, որպիսի հանգամանքը բավարար է փաստելու, որ Դատարանի կողմից թույլ է տրվել քրեադատավարական օրենքի հիմնարար խախտում:

(...)

Վերաքննիչ դատարանը քննարկման առարկա չի դարձնում պաշտպանների և դադախագի վերաքննիչ բողոքներում շարադրված մյուս փաստարկները՝ կալանավորման հիմքերի, պայմանների և պարզաճ ջանասիրության մասով (...)»<sup>7</sup>:

10. Արարատի և Վայոց ձորի մարզերի առաջին ատյանի ընդհանուր իրավասության դատարանում 2021 թվականի հունիսի 17-ին ստացվել է քրեական գործը՝ ըստ մեղադրանքի Երեմ Հովհաննիսյանի՝ ՀՀ քրեական օրենսգրքի 34-104-րդ հոդվածի 1-ին մասով և Աշոտ Սահակյանի՝ ՀՀ քրեական օրենսգրքի 38-34-104-րդ հոդվածի 1-ին մասով: Քրեական գործը դատական քննության նշանակելու մասին Արարատի և Վայոց ձորի մարզերի առաջին ատյանի ընդհանուր իրավասության դատարանի՝ 2021 թվականի հուլիսի 2-ի որոշմամբ Ե.Հովհաննիսյանի նկատմամբ նախաքննության ընթացքում որպես խափանման միջոց ընտրված կալանավորումը թողնվել է անփոփոխ: 2021 թվականի հոկտեմբերի 8-ի դատական նիստում քննության առնելով ամբաստանյալ Ե.Հովհաննիսյանի նկատմամբ ընտրված խափանման միջոցը փոխելու մասին պաշտպաններ Ա.Կարապետյանի և Ս.Հովհաննիսյանի միջնորդությունը՝ Արարատի և Վայոց ձորի մարզերի առաջին ատյանի ընդհանուր իրավասության դատարանը նույն օրվա թիվ ԱՎԴ4/0019/01/21 որոշմամբ այն բավարարել է՝ ամբաստանյալ Ե.Հովհաննիսյանի նկատմամբ որպես խափանման միջոց ընտրված կալանքը փոխարինելով գրավով՝ գրավի չափ սահմանելով 3 (երեք) միլիոն ՀՀ դրամը: Նշված որոշման դեմ վերաքննիչ բողոքը ՀՀ վերաքննիչ քրեական դատարանի 2022 թվականի փետրվարի 21-ի որոշմամբ մերժվել է<sup>8</sup>:

### **Վճռաբեկ դատարանի պատճառաբանությունները և եզրահանգումը.**

<sup>7</sup> Տե՛ս նյութեր, հատոր 2, թերթեր 50-58:

<sup>8</sup> Տե՛ս datalex.am տեղեկատվական համակարգը:

11. Վճռաբեկ դատարանը գտնում է, որ այն դեպքերում, երբ կալանքը որպես խափանման միջոց կիրառելու կամ կալանքի տակ պահելու ժամկետը երկարացնելու միջնորդություն հարուցելուց հետո անձին առաջադրված մեղադրանքը փոփոխվում կամ լրացվում է, հիմնավոր կասկածի առկայությունը ստուգելու իրավաչափության կապակցությամբ առկա է օրենքի միատեսակ կիրառության ապահովման խնդիր: Ուստի անհրաժեշտ է սույն գործով արտահայտել իրավական դիրքորոշումներ, որոնք կարող են ուղղորդող նշանակություն ունենալ նման գործերով դատական պրակտիկայի ճիշտ ձևավորման համար:

12. Սույն գործով Վճռաբեկ դատարանի առջև բարձրացված իրավական հարցը հետևյալն է. հիմնավորվա՞ծ են արդյոք հիմնավոր կասկածի բացակայության հիմքով Առաջին ատյանի դատարանի՝ 2021 թվականի մայիսի 25-ի որոշումը բեկանելու վերաբերյալ Վերաքննիչ դատարանի հետևություններն այն պատճառաբանությամբ, որ կալանքի տակ պահելու ժամկետը երկարացնելու վերաբերյալ միջնորդության մեջ ներկայացված մեղադրանքի փոփոխությունը բացառում է հիմնավոր կասկածի առկայությունը:

13. ՀՀ Սահմանադրության 27-րդ հոդվածի 1-ին մասի համաձայն՝  
*«Յուրաքանչյուր ոք ունի անձնական ազատության իրավունք: Ոչ ոք չի կարող անձնական ազատությունից զրկվել այլ կերպ, քան հետևյալ դեպքերում և օրենքով սահմանված կարգով՝*

*(...)*

*4) անձին իրավասու մարմին ներկայացնելու նպատակով, երբ առկա է նրա կողմից հանցանք կատարած լինելու հիմնավոր կասկած, կամ երբ դա հիմնավոր կերպով անհրաժեշտ է հանցանքի կատարումը կամ դա կատարելուց հետո անձի փախուստը կանխելու նպատակով (...):»:*

«Մարդու իրավունքների և հիմնարար ազատությունների պաշտպանության մասին» եվրոպական կոնվենցիայի 5-րդ հոդվածի համաձայն՝ *«1. Յուրաքանչյուր ոք ունի ազատության և անձնական անձեռնմխելիության իրավունք: Ոչ ոքի չի կարելի ազատությունից զրկել այլ կերպ, քան հետևյալ դեպքերում և օրենքով սահմանված կարգով.*

(...)

գ) անձի օրինական կալանավորումը կամ ձերբակալումը՝ իրավախախտում կատարած լինելու հիմնավոր կասկածի առկայության դեպքում նրան իրավասու օրինական մարմինն ներկայացնելու նպատակով կամ այն դեպքում, երբ դա հիմնավոր կերպով անհրաժեշտ է համարվում նրա կողմից հանցագործության կատարումը կամ այն կատարելուց հետո նրա փախուստը կանխելու համար (...):»:

ՀՀ քրեական դատավարության օրենսգրքի 135-րդ հոդվածի 2-րդ մասի համաձայն՝ «Կալանավորումը մեղադրյալի նկատմամբ կարող է կիրառվել միայն այն դեպքում, երբ կա հիմնավոր կասկած, որ նա կատարել է այնպիսի հանցանք, որի համար նախատեսվող ազատազրկման ձևով պարժի առավելագույն ժամկետը մեկ տարուց ավելի է (...):»:

14. Կալանավորման պայմաններից մեկի՝ հանցանք կատարած լինելու հիմնավոր կասկածի առնչությամբ Մարդու իրավունքների եվրոպական դատարանն (այսուհետ՝ նաև Եվրոպական դատարան) իր նախադեպային իրավունքում բազմիցս վերահաստատել է, որ «հիմնավոր կասկածը» եզրույթը ենթադրում է փաստերի կամ տեղեկությունների առկայություն, որոնք հնարավորություն կտան անաչառ դիտորդին եզրակացնելու, որ տվյալ անձը հնարավոր է, որ կատարած լինե՛ր հանցանքը: Սակայն պարտադիր չէ, որ կասկածը հիմնավորող փաստերը բավարարեն այն նույն սանդղակին, որն անհրաժեշտ է անձի դատապարտումը կամ նրա նկատմամբ մեղադրանք առաջադրելը հիմնավորելու համար, քանի որ այդ փաստերը կարող են հայտնաբերվել ավելի ուշ՝ քրեական գործի քննության փուլում<sup>9</sup>: Ընդ որում, Եվրոպական դատարանը հստակ ընդգծել է, որ հիմնավոր կասկածի առկայությունը փաստական կողմից զատ, պահանջում է, որ դրա հիմքում դրված փաստերը, ներպետական օրենսդրության համաձայն, որակվեն որպես հանցավոր վարքագիծ<sup>10</sup>: Ըստ այդմ, հիմնավոր կասկածը չի կարող առկա լինել, եթե

<sup>9</sup> Տե՛ս Մարդու իրավունքների եվրոպական դատարանի՝ *K. F. v. Germany* գործով 1997 թվականի նոյեմբերի 27-ի վճիռը, զանգատ թիվ 144/1996/765/962, կետ 57:

<sup>10</sup> Տե՛ս Մարդու իրավունքների եվրոպական դատարանի՝ *Kandzhov v. Bulgaria* գործով 2008 թվականի նոյեմբերի 6-ի վճիռը, զանգատ թիվ 68294/01, կետ 57:

արարքը, որի կատարման մեջ կասկածվում է անձը, դրա կատարման պահին չի համարվել հանցագործություն<sup>11</sup>:

15. Վերոշարադրյալի հաշվառմամբ՝ Վճռաբեկ դատարանը կրկնում է, որ կալանավորման պայմանների թվում հատուկ կարևորություն ունի անձի կողմից իրեն վերագրվող հանցագործությունը կատարած լինելու հիմնավոր կասկածը<sup>12</sup>: Հիմնավոր կասկածի հարցը քննարկելիս, դատարանը, ելնելով մարդու իրավունքների և ազատությունների պաշտպանությունն ապահովելու պարտավորությունից, պետք է քննարկման առարկա դարձնի երկու հիմնական փոխկապված հարցեր: Առաջին՝ առկա՞ են արդյոք կասկածը հիմնավորող տեղեկություններ, փաստեր կամ ապացույցներ, որոնք ուղղակիորեն կմատնանշեն անձի առնչությունն իրեն վերագրվող ենթադրյալ հանցագործությանը, երկրորդ՝ դեպքը, որի կատարման մեջ անձը կասկածվում է, արդյո՞ք առերևույթ համընկնում է քրեական օրենսգրքով սահմանված որևէ հանցակազմի հատկանիշներին<sup>13</sup>:

15.1. Վճռաբեկ դատարանը միննույն ժամանակ կրկնում է, որ մինչդատական վարույթի նկատմամբ դատական վերահսկողություն իրականացնելիս, դատարանն իրավունք չունի անդրադառնալու մեղադրանքի էությանը, հիմնավորվածությանը, քանի որ մինչդատական վարույթի նկատմամբ դատական վերահսկողությունը չի հետապնդում կատարված հանցագործության բոլոր հանգամանքները հետազոտելու և դրանց քրեաիրավական գնահատական տալու կամ տրված գնահատականը ստուգելու ու համապատասխան որոշում կայացնելու նպատակ: Այդ հարցերը կարող են քննարկման առարկա դառնալ միայն գործն ըստ էության քննելու և լուծելու ընթացքում, այսինքն՝ հանդիսանում են արդարադատության իրականացման արդյունքում լուծման ենթակա հարցեր: Եթե մինչդատական վարույթի նկատմամբ դատական վերահսկողություն իրականացնելիս դատարանն անդրադառնա այդ հարցերին և որոշում կայացնի դրանց վերաբերյալ, ապա

<sup>11</sup> Տե՛ս Մարդու իրավունքների եվրոպական դատարանի՝ *Wloch v. Poland* գործով 2000 թվականի հոկտեմբերի 19-ի վճիռը, գանգատ թիվ 27785/95, կետ 109, Խաչատրյանը և այլք ընդդեմ Հայաստանի գործով 2012 թվականի նոյեմբերի 27-ի վճիռը, գանգատ թիվ 23978/06, կետ 136:

<sup>12</sup> Տե՛ս Վճռաբեկ դատարանի՝ *Վահրամ Գևորգյանի* գործով 2011 թվականի փետրվարի 24-ի թիվ ԵԿԴ/0678/06/10 որոշման 19-23-րդ կետերը, *Էդգար Եղիազարյանի* գործով 2017 թվականի հունիսի 22-ի թիվ ԵԱՆԴ/0017/06/16 որոշման 15-րդ կետը:

<sup>13</sup> Տե՛ս Վճռաբեկ դատարանի՝ *Հարություն Խաչատրյանի* գործով 2011 թվականի դեկտեմբերի 22-ի թիվ ՏԴ2/0009/06/11 որոշման 15-րդ կետը:

կիսախտվի քրեական դատավարության փուլային կառուցվածքը, քրեադատավարական գործառնությունների տարանջատման սկզբունքը, իսկ մինչդատական վարույթի նկատմամբ դատական վերահսկողությունը կվերաձվի բուն արդարադատության իրականացման գործընթացի<sup>14</sup>:

Ուստիև հիմնավոր կասկածի առկայությունը ստուգելիս դատարանն իրավասու չէ կանխորոշելու մեղքի հարցը, իրավական գնահատական տալու անձի մեղավորությանը կամ անմեղությանը, անմիջականորեն փաստելու անձի արարքում հանցակազմի առկայությունը կամ բացակայությունը: Հիմնավոր կասկածի հարցը գնահատման ենթարկելիս վճռորոշ նշանակություն կարող են ունենալ այն իրավիճակները, երբ արարքին տրված իրավական որակումը ակնհայտորեն չհամապատասխանի արարքի փաստական նկարագրությանը (կամ անձին վերագրված փաստերը հաստատող՝ միջնորդությանը կից ներկայացված նյութերին), իսկ արարքի փաստական կողմը առերևույթ վկայի արարքին տրված իրավական որակման համեմատությամբ իր բնույթով առավել նվազ ծանրության ենթադրյալ հանցագործության կատարման մասին<sup>15</sup>:

15.2. Վերահաստատելով և զարգացնելով վերոնշյալ իրավական դիրքորոշումը՝ Վճռաբեկ դատարանը փաստում է, որ կալանքը որպես խափանման միջոց կիրառելու կամ կալանքի տակ պահելու ժամկետը երկարացնելու վերաբերյալ միջնորդության քննարկման շրջանակում հիմնավոր կասկածի առկայությունը գնահատելիս դատարանը խնդիր ունի պարզելու ոչ թե անձին մեղսագրված արարքին տրված իրավական գնահատականի ճիշտ կամ սխալ լինելը, այլ այդ արարքում ՀՀ քրեական օրենսգրքի հատուկ մասով նախատեսված հանցակազմի առերևույթ առկայությունը և այդ արարքի փաստական նկարագրության առերևույթ համապատասխանությունն այդ հանցակազմի հատկանիշներին: Այլ կերպ՝ խնդրո առարկա միջնորդության քննարկման արդյունքում դատարանի կողմից հիմնավոր կասկածի առկայությունը փաստելը չի ենթադրում անձի մեղսագրված արարքին

<sup>14</sup> Տե՛ս Հարություն Խաչատրյանի գործով վերը հիշատակված որոշման 13-րդ կետը:

<sup>15</sup> Տե՛ս Վճռաբեկ դատարանի՝ *Էդգար Եղիազարյանի* գործով 2017 թվականի հունիսի 22-ի թիվ ԵԱՆՎ/0017/06/16 որոշման 15-րդ կետը:



տրված իրավական գնահատականը հավաստելը և կոնկրետ հանցակազմի առկայությունը հաստատապես հիմնավորելը:

16. Սույն գործի նյութերի ուսումնասիրությունից երևում է, որ.

- նախաքննության մարմնի՝ 2021 թվականի ապրիլի 6-ի որոշմամբ Ե.Հովհաննիսյանը ներգրավվել է որպես մեղադրյալ, և նրան մեղադրանք է առաջադրվել ՀՀ քրեական օրենսգրքի 258-րդ հոդվածի 4-րդ մասով<sup>16</sup>,

- նշված մեղադրանքով նախաքննության մարմինը 2021 թվականի մայիսի 20-ին միջնորդություն է ներկայացրել Առաջին ատյանի դատարան՝ Ե.Հովհաննիսյանին կալանքի տակ պահելու ժամկետը 2 (երկու) ամսով երկարացնելու վերաբերյալ: Նշված միջնորդության քննությունը դատական նիստում նշանակվել է 2021 թվականի մայիսի 25-ին<sup>17</sup>,

- նախաքննության մարմնի՝ 2021 թվականի մայիսի 25-ի որոշմամբ մեղադրյալ Ե.Հովհաննիսյանին առաջադրված մեղադրանքը փոփոխվել, և նրան նոր մեղադրանք է առաջադրվել ՀՀ քրեական օրենսգրքի 34-104-րդ հոդվածի 1-ին մասով<sup>18</sup>,

- քննիչ Վ.Ավետիսյանն Առաջին ատյանի դատարանում դատական նիստի ժամանակ հայտնել է, որ Ե.Հովհաննիսյանին կալանքի տակ պահելու ժամկետը երկարացնելու վերաբերյալ միջնորդությունը ներկայացվել է 2021 թվականի մայիսի 20-ին, և այդ օրվա դրությամբ մեղադրյալ Ե.Հովհաննիսյանին ՀՀ քրեական օրենսգրքի 34-104-րդ հոդվածի 1-ին մասով մեղադրանք առաջադրված չի եղել, և որ միջնորդության մեջ ներկայացված հիմնավոր կասկածը վերաբերում է ՀՀ քրեական օրենսգրքի 258-րդ հոդվածի 4-րդ մասով առաջադրված մեղադրանքին<sup>19</sup>,

- Առաջին ատյանի դատարանը, մասնակի բավարարելով մեղադրյալ Ե.Հովհաննիսյանին կալանքի տակ պահելու ժամկետը երկարացնելու վերաբերյալ նախաքննության մարմնի միջնորդությունը, արձանագրել է, որ մեղադրյալ Ե.Հովհաննիսյանն առնչություն ունի իրեն մեղսագրվող ենթադրյալ հանցագործությանը, այսինքն՝ առկա է տվյալ ենթադրյալ հանցանքի կատարման

<sup>16</sup> Տե՛ս սույն որոշման 7-րդ կետը:

<sup>17</sup> Տե՛ս սույն որոշման 7.1-րդ կետը:

<sup>18</sup> Տե՛ս սույն որոշման 7.2-րդ կետը:

<sup>19</sup> Տե՛ս սույն որոշման 7.3-րդ կետը:

հիմնավոր կասկածը, ինչպես նաև դեպքի համընկնումը այն ենթադրյալ հանցանքին, որի առերևույթ կատարման մեջ Ե.Հովհաննիսյանը մեղադրվում է: Բացի այդ վարույթն իրականացնող մարմնից մեղադրյալի թաքնվելու հավանականությունը գնահատելիս Առաջին ատյանի դատարանը հաշվի է առել այն հանգամանքը, որ մեղադրյալ Ե.Հովհաննիսյանին մեղսագրվող ՀՀ քրեական օրենսգրքի 258-րդ հոդվածի 4-րդ մասով արարքը դասվում է ծանր հանցագործությունների շարքին, որի համար նախատեսվում է պատիժ՝ ազատազրկում 4-7 տարի ժամկետով, բացի այդ, փոփոխվել է նրան առաջադրված մեղադրանքը ՀՀ քրեական օրենսգրքի 34-104-րդ հոդվածի 1-ին մասով, որի համար նախատեսվում է պատիժ ութից տասնհինգ տարի ժամկետով<sup>20</sup>,

- Վերաքննիչ դատարանը, բեկանելով և փոփոխելով Առաջին ատյանի դատարանի՝ 2021 թվականի մայիսի 25-ի որոշումը արձանագրել է, որ մեղադրանքի փոփոխությունը բացառում է սկզբնական մեղադրանքով հիմնավոր կասկածի քննությունն առհասարակ, քանի որ այն այլևս օբյեկտիվորեն գոյություն չունի, հետևաբար, ինքնին այդ հանգամանքը բավարար է փաստելու, որ սկզբնական մեղադրանքով հիմնավոր կասկածի մասին խոսք լինել չի կարող, այն բացակայում է: Վերաքննիչ դատարանն իր որոշմամբ արձանագրել է նաև, որ Առաջին ատյանի դատարանը հիմնավոր կասկածի հարցը քննարկել և հանգել է եզրակացության, որ մեղադրյալ Ե.Հովհաննիսյանն առնչություն ունի իրեն մեղսագրվող ենթադրյալ հանցագործությանը, մինչդեռ պարզ չի դառնում, թե Առաջին ատյանի դատարանը որ մեղադրանքով է հաստատված համարել հիմնավոր կասկածը՝ ՀՀ քրեական օրենսգրքի 258-րդ հոդվածի 4-րդ մասով, թե 34-104-րդ հոդվածի 1-ին մասով: Նույն որոշմամբ Վերաքննիչ դատարանի գնահատմամբ՝ Առաջին ատյանի դատարանը հիմնավոր կասկածը քննարկել և հաստատված է համարել ինչպես ՀՀ քրեական օրենսգրքի 258-րդ հոդվածի 4-րդ մասով, այնպես էլ 34-104-րդ հոդվածի 1-ին մասով, մինչդեռ առաջինը գոյություն չի ունեցել դատարանի կողմից որոշում կայացնելու պահին, քանի որ այն արդեն իսկ քննիչի կողմից փոփոխված է եղել, իսկ երկրորդ մեղադրանքով միջնորդություն Առաջին ատյանի դատարանում չի եղել, հետևաբար

<sup>20</sup> Տե՛ս սույն որոշման 8-րդ կետը:

Առաջին ատյանի դատարանը չէր կարող այն քննարկել: Վերաքննիչ դատարանը խնդրահարույց է համարել այն, որ Առաջին ատյանի դատարանը մեղադրյալին կալանքի տակ պահելու ժամկետը երկարացնելու անհրաժեշտությունը հիմնավորելու համար հիմք է ընդունել ինչպես ՀՀ քրեական օրենսգրքի 258-րդ հոդվածի 4-րդ մասով նախատեսված հանցագործության համար օրենքով սահմանված պատժաչափը, այնպես էլ 34-104-րդ հոդվածի 1-ին մասով նախատեսված հանցագործության համար օրենքով սահմանված պատժաչափը: Վերաքննիչ դատարանը նշել է, որ Առաջին ատյանի դատարանը Ե.Հովհաննիսյանին կալանքի տակ պահելու ժամկետը երկարացնելու մասին որոշում է կայացրել այդ պահին գոյություն չունեցող մեղադրանքով՝ փաստելով նաև մյուս մեղադրանքի առկայությունը, որի վերաբերյալ միջնորդություն ներկայացված չի եղել<sup>21</sup>:

17. Նախորդ կետում մեջբերված փաստական տվյալների վերլուծությունը ցույց է տալիս, որ Ե.Հովհաննիսյանին կալանքի տակ պահելու ժամկետը երկարացնելու մասին միջնորդությունը ներկայացվել է 2021 թվականի մայիսի 20-ին, և միջնորդության մեջ ներկայացված հիմնավոր կասկածը վերաբերել է ՀՀ քրեական օրենսգրքի 258-րդ հոդվածի 4-րդ մասով առաջադրված մեղադրանքին: Քննարկվող միջնորդությունը ներկայացնելուց հետո՝ 2021 թվականի մայիսի 25-ին, Ե.Հովհաննիսյանին առաջադրված մեղադրանքը փոփոխվել, և նրան նոր մեղադրանք է առաջադրվել ՀՀ քրեական օրենսգրքի 34-104-րդ հոդվածի 1-ին մասով, ինչի մասին քննիչ Վ.Ավետիսյանը հայտնել է 2021 թվականի մայիսի 25-ին՝ Առաջին ատյանի դատարանի դատական նիստի ժամանակ: Ըստ այդմ էլ, Առաջին ատյանի դատարանը քննարկել է Ե.Հովհաննիսյանին առաջադրված մեղադրանքով հիմնավոր կասկածի առկայությունը՝ փաստելով Ե.Հովհաննիսյանի առնչությունն իրեն մեղսագրված արարքին և դրանում հանցակազմի առերևույթ առկայությունը: Ընդ որում, նոր մեղադրանքի ուսումնասիրությունը ցույց է տալիս, որ Ե.Հովհաննիսյանին մեղսագրված արարքի փաստական հանգամանքների էական փոփոխություն տեղի չի ունեցել, այլ փոխվել է արարքի իրավական

<sup>21</sup> Տե՛ս սույն որոշման 9-րդ կետը:

գնահատականը: Ուստի, Վճռաբեկ դատարանն իր անհամաձայնությունն է արտահայտում Վերաքննիչ դատարանի այն դիրքորոշմանը, որ Առաջին ատյանի դատարանի որոշումից պարզ չէ, թե վերջինս որ մեղադրանքով է հաստատված համարել հիմնավոր կասկածը: Ընդ որում, Վճռաբեկ դատարանը փաստում է, որ այս առումով Վերաքննիչ դատարանը հակասական դիրքորոշում է արտահայտել՝ մի կողմից՝ փաստելով, որ Առաջին ատյանի դատարանի որոշումից պարզ չէ, թե վերջինս որ մեղադրանքով է հաստատված համարել հիմնավոր կասկածը, մյուս կողմից՝ հստակորեն արձանագրելով, որ Առաջին ատյանի դատարանը հիմնավոր կասկածը քննարկել և հաստատած է համարել ինչպես ՀՀ քրեական օրենսգրքի 258-րդ հոդվածի 4-րդ մասով, այնպես էլ 34-104-րդ հոդվածի 1-ին մասով: Ինչ վերաբերում է մեղադրանքի փոփոխությանը, ապա Առաջին ատյանի դատարանը դա քննարկել և ՀՀ քրեական օրենսգրքի 34-104-րդ հոդվածի 1-ին մասով նախատեսված պատժի խստությունը հաշվի է առել ոչ թե հիմնավոր կասկածի շրջանակում, այլ կալանավորման հիմքերից վարույթն իրականացնող մարմնից թաքնվելու հավանականությունը գնահատելիս:

17.1. Ինչ վերաբերում է Վերաքննիչ դատարանի այն դիրքորոշմանը, որ կոնկրետ դեպքում թե սկզբնական և թե փոփոխված մեղադրանքով հիմնավոր կասկածի առկայությունը քննարկվել չէր կարող, ապա սույն որոշման 14-15.2-րդ կետերում ներկայացված իրավական դիրքորոշումների հաշվառմամբ՝ Վճռաբեկ դատարանը փաստում է, որ Առաջին ատյանի դատարանը, քննարկելով սկզբնական մեղադրանքով հիմնավոր կասկածի առկայությունը և միաժամանակ տեղյակ լինելով սկզբնական մեղադրանքով Ե.Հովհաննիսյանին մեղսագրված արարքին տրված **իրավական գնահատականի** փոփոխության մասին, ոչ թե խնդիր ունեւ հաստատելու սկզբնական կամ փոփոխված իրավական գնահատականը, այլ պարզելու Ե.Հովհաննիսյանին մեղսագրված արարքում հանցակազմի առերևույթ առկայությունը: Վճռաբեկ դատարանն ընդգծում է նաև, որ սույն գործով մեղադրանքի հիմքում դրված փաստական հանգամանքների փոփոխություն տեղի չի ունեցել, կալանավորման հիմքերի ու պայմանների առկայությունը հիմնավորող նոր փաստեր չեն ներկայացվել: Հետևաբար, անկախ այն հանգամանքից, որ կալանքի տակ պահելու ժամկետը երկարացնելու

վերաբերյալ միջնորդությունը ներկայացվել էր սկզբնական մեղադրանքով, փոփոխված մեղադրանքի մասին տեղյակ լինելու պայմաններում Առաջին ատյանի դատարանը զրկված չէր **նույն փաստական հանգամանքների** պայմաններում փոփոխված **իրավական գնահատականը** հաշվի առնելու հնարավորությունից: Վերոշարադրյալը բխում է իրավաչափ այն գաղափարից, որ նույն տրամաբանությամբ դատարանը չէր կարող զրկված լինել մեղադրանքի մեղմացման պայմաններում կալանքը որպես խափանման միջոց կիրառելու կամ կալանքի տակ պահելու ժամկետը երկարացնելու նպատակահարմարությունն ավելի մեղմ մեղադրանքի լույսի ներքո քննարկելու հնարավորությունից: Այս դիրքորոշումը հիմնավորվում է նաև նրանով, որ օրինակ՝ կալանքի տակ պահելու ժամկետը երկարացնելու վերաբերյալ միջնորդությունը բավարարելուց հետո առաջադրված սկզբնական մեղադրանքի իրավական գնահատականի փոփոխությունն կասկածի տակ չի կարող դնել սկզբնական մեղադրանքով հիմնավոր կասկածի վերաբերյալ դիրքորոշման իրավաչափությունը:

18. Հետևաբար, Վճռաբեկ դատարանն արձանագրում է, որ հիմնավորված չեն հիմնավոր կասկածի բացակայության հիմքով Առաջին ատյանի դատարանի՝ 2021 թվականի մայիսի 25-ի որոշումը բեկանելու վերաբերյալ Վերաքննիչ դատարանի հետևությունները՝ այն պատճառաբանությամբ, որ կալանքի տակ պահելու ժամկետը երկարացնելու միջնորդության մեջ ներկայացված մեղադրանքի փոփոխությունը բացառում է հիմնավոր կասկածի առկայությունը:

19. Ամփոփելով վերոշարադրյալը՝ Վճռաբեկ դատարանը եզրահանգում է, որ մեղադրյալ Ե.Հովհաննիսյանի նկատմամբ կալանավորումը որպես խափանման միջոց կիրառելու վերաբերյալ Առաջին ատյանի դատարանի որոշման իրավաչափության ստուգման ընթացքում Վերաքննիչ դատարանի կողմից թույլ են տրվել ՀՀ քրեական դատավարության օրենսգրքի 6-րդ, 17-րդ, 55-րդ, 135-րդ, 136-րդ և 137-րդ հոդվածներով նախատեսված պահանջների խախտումներ, որոնք ազդել են գործով ճիշտ որոշում կայացնելու վրա, ինչը, ՀՀ քրեական դատավարության օրենսգրքի 398-րդ հոդվածի համաձայն, Վերաքննիչ դատարանի որոշումը բեկանելու հիմք է: Սակայն հաշվի առնելով, որ սույն գործով մինչդատական վարույթն ավարտվել է, Ե.Հովհաննիսյանի վերաբերյալ քրեական գործն ըստ

էության քննության համար ուղարկվել է Արարատի և Վայոց ձորի մարզերի առաջին ատյանի ընդհանուր իրավասության դատարան, և որոշում է կայացվել ամբաստանյալ Ե.Հովհաննիսյանի նկատմամբ գրավը որպես խափանման միջոց կիրառելու վերաբերյալ<sup>22</sup>, ուստի բողոքարկված դատական ակտը չի կարող բեկանվել, քանի որ այն եղել է ժամանակավոր և սույն որոշումը կայացնելու պահին կորցրել է իր իրավական նշանակությունը:

Ելնելով վերոգրյալից և ղեկավարվելով Հայաստանի Հանրապետության Սահմանադրության 162-րդ, 163-րդ, 171-րդ հոդվածներով, Հայաստանի Հանրապետության քրեական դատավարության օրենսգրքի 39-րդ, 43-րդ, 361-րդ, 415.1-րդ, 418.1-րդ, 419-րդ, 422-423-րդ հոդվածներով՝ Վճռաբեկ դատարանը

### Ո Ր Ո Շ Ե Ց

1. Մեղադրյալ Երեմ Վահանի Հովհաննիսյանի վերաբերյալ ՀՀ վերաքննիչ քրեական դատարանի՝ 2021 թվականի հուլիսի 7-ի որոշումը թողնել օրինական ուժի մեջ՝ հիմք ընդունելով Վճռաբեկ դատարանի որոշմամբ արտահայտված իրավական դիրքորոշումները:

2. Որոշումն օրինական ուժի մեջ է մտնում կայացման պահից, վերջնական է և ենթակա չէ բողոքարկման:

Նախագահող՝ \_\_\_\_\_ Հ.ԱՍԱՏՐՅԱՆ

Դատավորներ՝ \_\_\_\_\_ Ս.ԱՎԵՏԻՍՅԱՆ

\_\_\_\_\_ Լ.ԹԱԴԵՎՈՍՅԱՆ

\_\_\_\_\_ Դ.ԽԱՉԱՏՈՒԹՅԱՆ

\_\_\_\_\_ Ա.ՊՈՂՈՍՅԱՆ

\_\_\_\_\_ Ս.ՕՀԱՆՅԱՆ

<sup>22</sup> Տե՛ս սույն որոշման 8-րդ կետը: